

“Cors de formazion” te Museo ladin

Na bela ocajon sporta dal Pian di joegn, per cognoscer miec la storia e la cultura de Fascia

Cultura e sozietà - Jà n bel numer de jent se à scrit ite al “Cors de formazion”, pissà da l’Istitut Cultural Ladin tel chèder di projec del Pian per i joegn de Fascia, che sarà metù a jir dai 14 de setember aló dal Museo Ladin de Sèn Jan e te sia sezions sul teritorie, enschin ai 12 de november 2009.

Dassen na bela scomenzadiva chela che viventarà l’uton cultural te val, che à l’obietif de arvejinèr i joegn fascegn a la storia e a la cultura de sia comunità e ge dèr l met de colaborèr con l’Istitut ence te na prospetiva profescionèla, desche operadores, per la vijites vidèdes te Museo, te Molin de Pezol de Pera e te la Sia de Penia, o desche aiut te la ativitèdes di Servijes educatives.

L program metù jù, che cour la 40 ores pervedudes per l cors, l’é struturà te ores de lezioni e scontrèdes operatives de laboratorie che jirà a tor ite i aspec de maor emportanza de la cultura ladina documenté te Museo. La storia de la comunità de Fascia

tel chèder più gran de la mendranza ladina de la Dolomites, l lengaz, la usanzas, la tradizions da zacan, la dinamiches de l’identità e l confront co la sozietà d’aldidanché l’é demò valgun anter i temes che vegnarà traté e debatui endèna la scontrèdes.

Dapodò vegnarà esplorà la arees tematiches del percors espositif del Museo co na atenzion particulèra ai ogeg etnografics metui fora e a coche i vegnìa duré te la sozietà tradizionèla; vegnarà dat informazions su la strutura museala, su l’Istitut Cultural Ladin e sui archivies etnografics che pel vegnir consulté ence da la jent. Gran lèrga ge vegnarà dedichèda a la multimedialità e a coche se doura i archivies informatics de l’Istitut a la leta te la rei internet, desche l sistem Scrin e SSM (Sistem de suport multimedial del Museo). Tolarà pèrt a la scontrèdes ence esperc de nonzech, desche Cesare Poppi, Gianpaolo Gri, Chiara Felicetti, e joegn studiosc che se dèsc jù

te la enrescida desche Cesare Bernard e Francesca Giovanazzi. Sia prejenza, ensema a l’organizacion prezisa e articolèda, l’é na garanzia de suzess per l projet, de na preparazion de calità, che pel averjer neva prospetives e enlumenèr la neva generazions.

Cognoscer l passà e fonèr la reijes tel teren sciantif de Fascia e de sia rica storia podarà segur didèr vèlch joen a crescer e a madurèr n pensier più encolorì, na coscienza più drete, n se averjer più schiet envers a la comunanza, per ge portèr idees e contribuir a na crescimonìa sozièla.

A chi che tolarà pèrt ge vegnarà dat n atestat sotescrit da l’Istitut Cultural Ladin che arà valor de califica per n lurier tel davegnir desche operator ti Servijes Educatives del Museo Ladin, per aer ence l met de sperimentèr diretamente la ativitèdes didatiches e se sproèr en pruma persona con desvaliva sorts de utenc de età desvalives.

Enschin ai 10 de setember se podarà se enschinuèr al cors: dantaldut i joegn anter i 17 e i 29 egn, ma ence duc chi che é enteressé, studenc e dozenc de la scola de Fascia, pel domanèr te Museo Ladin de tor pèrt a la scontrèdes formatives.

L cost pervedù per ogne persona l’é de 20,00 € e l tol ite i materièi didatichs e la sortides: pec scioldi per aer na bela ocajon da no lascèr corer demez, per cognoscer miec l lech maraveous olache vivon e al medemo temp ence chel che aon daite.

